

296 Relation de la Nouvelle France,
me cachasse point deuant sa face, & que ie ne
m'estoignasse point de ses volontez: ains au
contraire, infatuaret omnia consilia quæ
non esset ad suam gloriam: Ie le priois de
renuerser tous les conseils qui ne tenderoient
point à sa gloire, & de m'arrester dans le pays
de ces infideles, s'il n'apprennoit point ma re-
traite, & ma fuite. La seconde nuit de ma
prison volontaire, le Ministre des Hollandois
me vint dire que les Iroquois auoient bien fait
du bruit, & que les Hollandois habitans du
pays auoient peur qu'ils ne missent le feu dans
leurs maisons, ou qu'ils ne tûassent leurs be-
stiaux: ils ont raison de les craindre, puis qu'ils
les ont armez de bonnes arquebuses. A cela
ie responds, si propter me orta est tempe-
stas, proijcite me in mare: Si la tempeste
s'est eleuee à mon occasion, ie suis prest de l'ap-
paizer, en perdant la vie, ie n'auois iamais eu de
volonté de me sauuer, au preiudice du moind-
re homme de leur habitation. Enfin il me
fallut sortir de ma caverne: tous les Nauton-
niers s'en formalisoient, disans qu'on m'auoit
donné parole d'assurance, au cas que ie pusse
mettre le pied dans le Navire, & qu'on m'en
retiroit au moment qu'il m'y faudroit amener,
si ie n'y estois pas, que ie mettois mis en danger